

4.57

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

----- 2011 թվականի N -Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԲԱՐՁՐԱԳՈՒՅՆ ՈՒՍՈՒՄՆԱԿԱՆ  
ՀԱՍՏԱՏՈՒԹՅՈՒՆՆԵՐ ՕՏԱՐԵՐԿՐՅԱ ՔԱՂԱՔԱՑԻՆԵՐԻ ԸՆԴՈՒՆԵԼՈՒԹՅԱՆ ԿԱՐԳԸ  
ՀԱՍՏԱՏԵԼՈՒ ՄԱՍԻՆ

«Կրթության մասին» Հայաստանի Հանրապետության օրենքի 6-րդ հոդվածի 3-րդ մասին և «Բարձրագույն և հետբուհական մասնագիտական կրթության մասին» Հայաստանի Հանրապետության օրենքի 5-րդ հոդվածի 3-րդ մասին համապատասխան՝ Հայաստանի Հանրապետության կառավարությունը **որոշում է**.

1. Հաստատել Հայաստանի Հանրապետության բարձրագույն ուսումնական հաստատություններ օտարերկրյա քաղաքացիների ընդունելության կարգը՝ համաձայն հավելվածի:

2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

Ա. Աշոտյան

ԿԱՐԳ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԲԱՐՁՐԱԳՈՒՅՆ ՈՒՍՈՒՄՆԱԿԱՆ  
ՀԱՍՏԱՏՈՒԹՅՈՒՆՆԵՐ ՕՏԱՐԵՐԿՐՅԱ ՔԱՂԱՔԱՑԻՆԵՐԻ ԸՆԴՈՒՆԵԼՈՒԹՅԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգը սահմանում է օտարերկրյա քաղաքացիների (այսուհետ՝ օտարերկրացիների) Հայաստանի Հանրապետության բարձրագույն ուսումնական հաստատություններ և հետբուհական կրթական ծրագրեր իրականացնող կազմակերպություններ (այսուհետ՝ ուսումնական հաստատություններ) ընդունելության կարգը և պայմանները:
2. Սույն կարգը նպատակ ունի՝
  - 1) մատչելի դարձնել Հայաստանի Հանրապետության ուսումնական հաստատություններում կրթությունն օտարերկրացիների համար:
  - 2) ժողովուրդների միջև հարգանքի և փոխըմբռնման ոգով դաստիարակելու անհրաժեշտությունից ելնելով՝ ստեղծել համապատասխան պայմաններ երիտասարդության շրջանում հայ մշակութային ժառանգության նկատմամբ հետաքրքրության առաջացման համար, նպաստել հայագիտության զարգացմանը:
3. Սույն կարգով Հայաստանի Հանրապետության ուսումնական հաստատություններ ընդունված ուսանողների համար ուսուցումը կարող է կազմակերպվել գրական հայերենով կամ օտար լեզուներով:

II. ՕՏԱՐԵՐԿՐՅԱՑԻՆԵՐԻ ԸՆԴՈՒՆԵԼՈՒԹՅԱՆ ԿԱԶՄԱԿԵՐՊՄԱՆ ԿԱՐԳԸ

4. Օտարերկրացիները բարձրագույն և հետբուհական մասնագիտական կրթություն կարող են ստանալ «Կրթության մասին» և «Բարձրագույն և հետբուհական մասնագիտական կրթության մասին» Հայաստանի Հանրապետության օրենքներով նախատեսված բարձրագույն և հետբուհական հիմնական և լրացուցիչ կրթական ծրագրերով՝ ուսուցման առկա, հեռակա և հեռավար (դիստանցիոն) ձևերով, հաստատված մասնագիտությունների ցանկին համապատասխան (բացի ռազմական ու ոստիկանական բարձրագույն և հետբուհական մասնագիտական կրթության):
5. Օտարերկրացիները կարող են դիմել Հայաստանի Հանրապետության ուսումնական հաստատություններ նաև ընդհանուր հիմունքներով՝ դիմորդի փաստաթղթերը «Հ կրթության և գիտության նախարարության կողմից փորձաքննությունից» փաստաթղթում առկա տեղեկատվության իսկության ստուգումից և հյուպատոսական վավերացման առկայությունը ճշտելուց, ինչպես նաև հաշվառելուց՝ միասնական տեղեկատվական բանկի ստեղծումից հետո:
6. Դիմորդների փաստաթղթերի հաշվառումը և փորձաքննությունը կատարվում է Հայաստանի Հանրապետության կրթության և գիտության նախարարության կողմից:
7. Սույն կարգով բակալավրի որակավորման աստիճան ստանալու համար բարձրագույն ուսումնական հաստատություն կարող են դիմել այն օտարերկրացիները, ովքեր ստացել

են Հայաստանի Հանրապետությունում առնվազն միջնակարգ կրթություն կամ Հայաստանի Հանրապետության առնվազն միջնակարգ կրթության մակարդակին համապատասխան կրթություն և ունեն նշված կրթությունը հավաստող ավարտական փաստաթուղթ (ատեստատ, վկայական):

8. Սույն կարգով մագիստրոսի որակավորման աստիճան ստանալու համար ուսումնական հաստատություն կարող են դիմել այն օտարերկրացիները, ովքեր ստացել են Հայաստանի Հանրապետության առնվազն բակալավրի, դիպլոմավորված մասնագետի կամ մագիստրոսի որակավորման աստիճանին համապատասխան կրթություն եւ ունեն նշված կրթությունը հավաստող ավարտական փաստաթուղթ /դիպլոմ/, ՀՀ կրթության և գիտության նախարարի 2007 թվականի դեկտեմբերի 6-ի «Հայաստանի Հանրապետության բարձրագույն ուսումնական հաստատություններում մագիստրատուրայի ընդունելության և ուսուցման» N 1193-Ն հրամանով հաստատված կարգին (պետական գրանցման թիվ 11007459, 21.12.2007թ.) համապատասխան:
9. Սույն կարգով հետազոտողի կրթական ծրագրով ասպիրանտուրայում ուսանելու համար ուսումնական հաստատություն կարող են դիմել այն օտարերկրացիները, ովքեր ունեն Հայաստանի Հանրապետության առնվազն դիպլոմավորված մասնագետի կամ մագիստրոսի կրթական աստիճանին համապատասխան կրթություն և ունեն նշված կրթությունը հավաստող փաստաթուղթ (դիպլոմ):
10. Բակալավրի կրթական ծրագրով կրթություն ստանալու համար օտարերկրացի դիմորդների ընդունելությունն իրականացվում է դիմորդների փաստաթղթերի ուսումնասիրության և գիտելիքների ստուգման (այդ թվում՝ նաև հետագա ուսուցման լեզվի իմացության) հիման վրա: Հետագա ուսուցման լեզվին և բարձրագույն ուսումնական հաստատության համապատասխան մասնագիտության ընդունելության համար նախատեսված քննական առարկաներին չտիրապետող օտարերկրացիները պետք է ուսուցումն անցնեն Հայաստանի Հանրապետության ուսումնական հաստատության նախապատրաստական դասընթացում:  
Գիտելիքների ստուգումների արդյունքների հիման վրա դիմորդները կարող են ընդունվել առաջին կուրս:  
Գիտելիքների ստուգումն անցկացվում է տվյալ բարձրագույն ուսումնական հաստատության կողմից ՀՀ օրենսդրության պահանջներին համապատասխան՝ բուհի կողմից սահմանած գիտելիքների ստուգման կարգով և Հայաստանի Հանրապետության միջնակարգ կրթական ծրագրով: Գիտելիքների ստուգման կարգը և առարկայական ծրագրերը ներկայացվում են Հայաստանի Հանրապետության կրթության և գիտության նախարարություն՝ մինչև տվյալ տարվա դիմորդների փաստաթղթերն ընդունելու ժամկետի սկիզբը (ժամկետները հաստատվում են Հայաստանի Հանրապետության կրթության և գիտության նախարարի հրամանով):  
Հայաստանի Հանրապետության բարձրագույն ուսումնական հաստատությունների ընդունելության քննություններին մասնակցած և համապատասխան առարկաներից դրական գնահատականներ ստացած օտարերկրացիներն ընդունվում են առաջին կուրս՝ առանց գիտելիքների լրացուցիչ ստուգման:
11. Մագիստրոսի կրթական ծրագրով ուսանելու համար դիմած օտարերկրացիների ընդունելությունն իրականացվում է դիմորդների փաստաթղթերի ուսումնասիրության հիման վրա: Հետագա ուսուցման լեզվին չտիրապետող օտարերկրացիներն, պետք է ուսուցման դասընթացն անցնեն Հայաստանի Հանրապետության ուսումնական հաստատության նախապատրաստական դասընթացում:

Հետազոտողի կրթական ծրագրով ուսանելու համար դիմած օտարերկրացիների ընդունելությունն իրականացվում է ուսումնական հաստատության կողմից ՀՀ օրենսդրության պահանջներին համապատասխան հաստատված կարգով՝ դիմորդների փաստաթղթերի ուսումնասիրության, ինչպես նաև՝ դիմորդի կողմից ներկայացված գիտական ռեֆերատի վերաբերյալ Հայաստանի Հանրապետության համապատասխան ուսումնական հաստատությունների դրական կարծիքի հիման վրա:

12. Բակալավրի և մագիստրոսի կրթական ծրագրերով երկրորդ մասնագիտություն ստանալու համար դիմած օտարերկրացիների ընդունման ժամկետը, կուրսը և մյուս պայմանները սահմանում է դիմումները քննարկելու նպատակով ստեղծվող ատեստավորման հանձնաժողովը, որը ձևավորվում է Հայաստանի Հանրապետության կրթության և գիտության նախարարի 2006 թվականի օգոստոսի 15-ի «Հայաստանի Հանրապետության բարձրագույն մասնագիտական ուսումնական հաստատություններում երկրորդ մասնագիտություն ստանալու» N 671-Ն հրամանով հաստատված (պետական գրանցման թիվ 11006308, 29.09.2006թ.) կարգին համապատասխան:
13. Օտարերկրացիներն ուսումնական հաստատություններում կարող են սովորել.
  - 1) պայմանագրային հիմունքներով (վճարովի),
  - 2) միջպետական և միջգերատեսչական պայմանագրերով կամ համաձայնագրերով պետության կողմից ուսանողական նպաստների ձևով ուսման վարձի լրիվ փոխհատուցմամբ (անվճար) օտարերկրացիներին տրամադրվող տեղերի շրջանակներում,
  - 3) Հայաստանի Հանրապետության կառավարության կողմից սփյուռքահայերի ընդունելության համար տրամադրված պետության կողմից ուսանողական նպաստների ձևով ուսման վարձի լրիվ փոխհատուցմամբ (անվճար) տեղերի սահմաններում:
14. Սույն կարգով դիմորդների համար վճարովի տեղերի թիվը չի սահմանափակվում, եթե այլ բան նախատեսված չէ Հայաստանի Հանրապետության օրենսդրությամբ և ուսումնական հաստատության կանոնադրությամբ:
15. Սույն կարգով դիմորդների ընդունելությունը Հայաստանի Հանրապետության ուսումնական հաստատություններ իրականացվում է Հայաստանի Հանրապետության կրթության և գիտության նախարարության կողմից փաստաթղթերի փորձաքննությունից և հաշվառումից հետո, Հայաստանի Հանրապետության կրթության և գիտության նախարարի ուղեգիր-նամակների հիման վրա՝ Հայաստանի Հանրապետության ուսումնական հաստատության ղեկավարի հրամանով:
16. Սփյուռքահայերին պետության կողմից ուսանողական նպաստների ձևով ուսման վարձի լրիվ փոխհատուցմամբ (անվճար) առկա ուսուցմամբ բակալավրիատի կրթական ծրագրով ընդունելության տեղերի բաշխման ժամանակ նախապատվությունը տրվում է Սփյուռքի համար առաջնային համարվող հայագիտական, մանկավարժական և արվեստի բնագավառի մասնագիտություններին: Սփյուռքահայերին պետության կողմից տրամադրվող ուսանողական նպաստների ձևով ուսման վարձի լրիվ փոխհատուցմամբ (անվճար) առկա ուսուցմամբ բակալավրի կրթական ծրագրով ընդունելության տեղերի բաշխումը իրականացնում է Հայաստանի Հանրապետության կրթության և գիտության նախարարությունը՝ Հայաստանի Հանրապետության կրթության և գիտության նախարարի հրամանով ստեղծվող հանձնաժողովի կողմից:
17. Սփյուռքահայերին պետության կողմից ուսանողական նպաստների ձևով ուսման վարձի լրիվ փոխհատուցմամբ (անվճար) առկա ուսուցմամբ բակալավրի կրթական ծրագրով ընդունելության տեղերը տրամադրվում են տվյալ կրթական ծրագրի համար որպես

նպատակային՝ միայն տվյալ բարձրագույն ուսումնական հաստատությանում և տվյալ մասնագիտության գծով ուսումնառության ամբողջ ժամանակահատվածի համար:

18. Սույն կարգով ընդունելության ժամկետները սահմանվում են Հայաստանի Հանրապետության կրթության և գիտության նախարարի հրամանով:

### III. ՆԱԽԱՊԱՏՐԱՍՏԱԿԱՆ ԴԱՍՆՆԹԱՑՆԵՐԻ ԿԱԶՄԿԵՐՊՈՒՄԸ

19. Նախապատրաստական դասընթացների առարկայական ծրագրերը մշակվում ու հաստատվում են բարձրագույն ուսումնական հաստատությունների կողմից՝ համաձայնեցնելով ՀՀ կրթության և գիտության նախարարության հետ և ներկայացվում են ՀՀ կրթության և գիտության նախարարություն:

20. Նախապատրաստական դասընթացում ուսանող օտարերկրացիները համարվում են տվյալ բարձրագույն ուսումնական հաստատության ուսանողներ: Նրանց ուսուցման ժամկետի տևողությունը առկա ձևով պետք է կազմի առնվազն 6 ամիս:

21. Նախապատրաստական դասընթացից հեռացված կամ ազատված ուսանողները նախապատրաստական դասընթացում չեն վերականգնվում: Նախապատրաստական դասընթացից տեղափոխություն այլ բուհի նախապատրաստական դասընթաց չի թույլատրվում:

22. Նախապատրաստական դասընթացում ուսուցումն ավարտվում է ավարտական քննություններով, որոնք իրենց մեջ ներառում են տվյալ մասնագիտության ընդունելության քննություններով նախատեսված առարկաները: Նախապատրաստական դասընթացի ավարտական քննությունների վերահանձնում չի թույլատրվում, բացառությամբ հիվանդության պատճառով քննությանը չներկայանալու դեպքերի՝ համապատասխան տեղեկանքի առկայության դեպքում:

23. Քննությունները հաջողությամբ հանձնած ուսանողներին տրվում է տվյալ բարձրագույն ուսումնական հաստատության համապատասխան ավարտական փաստաթուղթ /վկայական/ համապատասխան ներդիրով:

24. Քննությունները հաջողությամբ հանձնած ուսանողները հրամանագրվում են առաջին կուրս: Նախապատրաստական դասընթացն ավարտելիս <<անբավարար>> գնահատականներ ստացած ուսանողներին տրվում է համապատասխան տեղեկանք:

25. Մեկ բարձրագույն ուսումնական հաստատության նախապատրաստական դասընթացի վկայականը կարող է հիմք հանդիսանալ մեկ այլ բարձրագույն ուսումնական հաստատությունում ուսումն առաջին կուրսում շարունակելու համար՝ ընդունելության համար սահմանված և նախապատրաստական դասընթացում ուսանած առարկաների համապատասխանության դեպքում և վերջինիս ղեկավարի համաձայնությամբ:

### IV. ՕՏԱՐԵՐԿՐԱԳԻՆԵՐԻ ՈՒՍՈՒՑՄԱՆ ԿԱԶՄԿԵՐՊՄԱՆ ՊԱՅՄԱՆՆԵՐԸ

26. Օտարերկրացիների ուսուցումը, հեռացումն (ազատումը) ու վերականգնումը, շարժունությունը իրականացվում է Հայաստանի Հանրապետությունում գործող կարգերին համապատասխան:

Սույն կարգով ընդունված ուսանողների հեռացման (ազատման) և շարժունության վերաբերյալ տեղեկություններն ուսումնական հաստատությունները ներկայացնում են

Հայաստանի Հանրապետության կրթության և գիտության նախարարություն՝  
երկշաբաթյա ժամկետում:

27. Յուրաքանչյուր ուսումնական տարվա ընդունելության ավարտից հետո՝ երկշաբաթյա ժամկետում, ուսումնական հաստատությունները Հայաստանի Հանրապետության կրթության և գիտության նախարարություն են ներկայացնում տեղեկատվություն՝ ընդհանուր հիմունքներով ընդունված օտարերկրացիների և սույն կարգով ընդունվածների վերաբերյալ:
28. Ուսումնական հաստատությունը ապահովում է օտարերկրացու հետ կնքվող պայմանագրում առանձին դրույթի ներառումը՝ Հայաստանի Հանրապետության մուտքի արտոնագիր և ժամանակավոր կացության կարգավիճակ ստանալու վերաբերյալ ՀՀ օրենսդրության պահանջների մասին:
29. Օտար լեզուներով ուսուցում կազմակերպող ուսումնական հաստատությունը՝
  - 1) տվյալ մասնագիտությամբ դասավանդվող հիմնական առարկաների գծով ապահովում է Հայաստանի Հանրապետության կրթության և գիտության նախարարության կողմից երեք տարին մեկ անգամ ատեստավորված, օտար լեզվով դասավանդելու երաշխավորություն ստացած կամ միջազգայնորեն ընդունված լեզվի իմացության մասին փաստաթուղթ ներկայացրած մասնագետներով,
  - 2) կազմակերպում է վերապատրաստման դասընթացներ օտար լեզվով դասավանդող մասնագետների համար:

#### V. ՓԱՍՏԱԹՂԹԵՐԻ ՆԵՐԿԱՅԱՑՄԱՆ ԵՎ ԱՆՁՆԱԿԱՆ ԳՈՐԾԻ ՎԱՐՄԱՆ ԿԱՐԳԸ

30. Սույն կարգին համապատասխան ուսումնական հաստատություններ ընդունվող դիմորդները ներկայացնում են հետևյալ փաստաթղթերը՝
  - 1) դիմում Հայաստանի Հանրապետության կրթության և գիտության նախարարի անունով,
  - 2) Հայաստանի Հանրապետության կրթության և գիտության նախարարության կողմից տրամադրված դիմում-հարցաթերթիկ /սահմանված ձևը կցվում է/,
  - 3) բժշկական տեղեկանք՝ ընդհանուր առողջական վիճակի վերաբերյալ: Սույն տեղեկանքը կարող է տրված լինել նաև Հայաստանի Հանրապետության բժշկական կազմակերպությունների կողմից,
  - 4) անձնագրի կամ ծննդյան վկայականի բոլոր էջերի պատճենները և / կամ մկրտության վկայականը,
  - 5) կրթական աստիճանի ավարտական փաստաթղթի պատճենը,
  - 6) 3x4 չափսի 4 լուսանկար,
  - 7) ինքնակենսագրություն (CV)՝ հայերեն, ռուսերեն կամ անգլերեն լեզուներով,
  - 8) հետբուհական մասնագիտական կրթություն ստանալու համար՝ ընտրած մասնագիտության թեմայով գիտական ռեֆերատ 20 էջի սահմաններում՝ հայերեն, ռուսերեն կամ անգլերեն լեզուներով,
  - 9) 30-րդ կետի 4) և 5) ենթակետերով նախատեսված փաստաթղթերն ընդունվում են քննարկման օտարերկրյա պետությունում ՀՀ դիվանագիտական ներկայացուցչության կողմից հյուպատոսական վավերացման առկայության դեպքում, եթե այլ բան նախատեսված չէ Հայաստանի Հանրապետության օրենքներով կամ միջազգային պայմանագրերով, որոնց մասնակից են Հայաստանի Հանրապետությունը և տվյալ պետությունը:

31. Փաստաթղթերը Հայաստանի Հանրապետության կրթության և գիտության նախարարություն ներկայացվում են հետևյալ կերպ.
- 1) դիմորդի կողմից անձամբ կամ նրա լիազորված անձի կողմից,
  - 2) բարձրագույն ուսումնական հաստատության կողմից,
  - 3) օտարերկրյա պետություններում Հայաստանի Հանրապետության դիվանագիտական ներկայացուցչությունների միջոցով,
  - 4) փոստով՝ Հայաստանի Հանրապետության կրթության և գիտության նախարարության պաշտոնական հասցեով :
32. Ներկայացված դիմումը կարող է մերժվել, եթե 30-րդ կետում նշված փաստաթղթերից որևէ մեկը պատշաճ կերպով չի ներկայացվել կամ փաստաթղթերը սահմանված ժամկետում չեն ամբողջացվել:
33. Հայաստանի Հանրապետության ուսումնական հաստատությունում պահվող յուրաքանչյուր օտարերկրացու և սույն կարգով ընդունված ուսանողի անձնական գործում պետք է լինեն նաև հետևյալ տեղեկությունները.
- 1) ուսումնառության տարիների ընթացքում քաղաքացիության փոփոխության կամ Հայաստանի Հանրապետության երկքաղաքացիություն ձեռք բերելու դեպքում՝ նոր անձնագրի պատճենը,
  - 2) ուսումնառության տարիների ընթացքում օտարերկրացիներին վերաբերվող (որոշումներ, հրամաններ և այլն) փաստաթղթերի պատճենները:

**«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԲԱՐՁՐԱԳՈՒՅՆ ՈՒՍՈՒՄՆԱԿԱՆ  
ՀԱՍՏԱՏՈՒԹՅՈՒՆՆԵՐ ՕՏԱՐԵՐԿՐՅԱ ՔԱՂԱՔԱՑԻՆԵՐԻ ԸՆԴՈՒՆԵԼՈՒԹՅԱՆ ԿԱՐԳԸ  
ՀԱՍՏԱՏԵԼՈՒ ՄԱՍԻՆ»**

**«Հ կառավարության որոշման նախագծի վերաբերյալ հիմնավորումը**

**Իրավական ակտի հիմնավորումը**

1.	<b>Անհրաժեշտություն</b>
	Նախագիծն ընդունվում է Հայաստանի Հանրապետության կառավարության 2004 թվականի ապրիլի 8-ի N 541-Ն որոշման 1-ին կետին համապատասխան ՀՀ վարչապետի 2010թ. օգոստոսի 25-ի N 677 – Ա որոշմամբ հաստատված « «Կրթության մասին», «Բարձրագույն և հետբուհական մասնագիտական կրթության մասին» և «Նախնական մասնագիտական (արհեստագործական) և միջին մասնագիտական կրթության մասին» Հայաստանի Հանրապետության օրենքներում լրացումներ կատարելու մասին» Հայաստանի Հանրապետության օրենքների կիրարկումն ապահովող միջոցառումների ցանկի» համաձայն:
2.	<b>Ընթացիկ իրավիճակը և խնդիրները</b>
	Ներկայումս օտարերկրյա քաղաքացիների ընդունելությունը ՀՀ բարձրագույն ուսումնական հաստատություններ կատարվում է ՀՀ կրթության և գիտության նախարարի 2007թ. հուլիսի 6-ի թիվ 629-Ն հրամանով հաստատված «Հայաստանի Հանրապետության ուսումնական հաստատություններում օտարերկրացիների ընդունելության» կանոններով: Համաձայն վերոհիշյալ կանոնների դրույթների՝ ՀՀ ուսումնական հաստատություններում սովորելու համար դիմած օտարերկրացիների փաստաթղթերի ուսումնասիրությունից, փորձաքննությունից և հաշվառումից հետո, այդ փաստաթղթերն ուղեգիր-նամակով ուղարկվում են համապատասխան ուսումնական հաստատություններ՝ դիմորդների գիտելիքների ստուգումը և ընդունելությունը կազմակերպելու համար: Բուհերի կողմից հաճախ միատեսակ չեն և միևնույն պայմաններ չեն ապահովվում դիմորդների գիտելիքների ստուգման գործընթացն իրականացնելիս, որն էլ իր մեջ պարունակում է կոռուպցիոն ռիսկեր:
3.	<b>Տվյալ բնագավառում իրականացվող քաղաքականություն</b>
	Կանոնակարգել օտարերկրյա քաղաքացիների ընդունելությունը ՀՀ բարձրագույն ուսումնական հաստատություններ և տվյալ բնագավառում կարգավորել իրավական դաշտը: Ստեղծել համապատասխան պայմաններ հայ մշակութային ժառանգության նկատմամբ հետաքրքրության առաջացման համար, նպաստել հայագիտության զարգացմանը:
4.	<b>Կարգավորման նպատակը և բնույթը</b>
	Նախագծի ընդունումը նպատակ ունի օտարերկրացիների (այդ թվում՝ սփյուռքահայերի) համար մատչելի դարձնել կրթությունը ՀՀ բարձրագույն ուսումնական հաստատություններում և հետբուհական կրթական ծրագրեր իրականացնող կազմակերպություններում: Դիմորդների գիտելիքների ստուգման գործընթացն իրականացնելիս դիմորդների համար ապահովել միևնույն պայմանները:
5.	<b>Նախագծի մշակման գործընթացում ներգրավված ինստիտուտներն ու անձինք</b>
	<<Երևանի պետական համալսարան>> ՊՈԱԿ, <<Հայաստանի պետական ճարտարագիտական համալսարան>> ՊՈԱԿ, <<Երևանի ճարտարապետության և շինարարության պետական համալսարան>> ՊՈԱԿ, <<Երևանի Վ.Բրյուսովի անվան պետական լեզվաբանական համալսարան>> ՊՈԱԿ,



	<<Երևանի Մ.Հերացու անվան պետական բժշկական համալսարան>> ՊՈԱԿ:
6.	<b>Ակնկալվող արդյունքը</b>
	Ակնկալվում է, որ նախագծի ընդունմամբ կկանոնակարգվի ու կհստակեցվի դիմորդների գիտելիքների գնահատման մեխանիզմները և չափանիշները, ինչպես նաև՝ ուսուցման պայմանները: